

## EFESIOS

*Pablo queédih ã túyat túutat*

<sup>1</sup> Weém, Pablo, biíhdih daacát túutna, yeéb Éfeso tútchidih moón Jesúíhwādih wã wahna caá. Dios ã náahat pah Jesucristo weemdih áih túini doonádih ã naáwát túutni caá. Yeéb Jesucristodih túi jenah jói cádahcanitdih wã daác wahna caá.\* <sup>2</sup> Jwĩ íip Dios, jwĩ Maáh Jesucristobut, yeebdíh oinit, ï túi teo wáaca naáh, caán bícdih ñi túi jumát pínah niijná. Weembút yeebdíh búdí wã túyat túutna caá.

*Jwiít Cristoíhwādih Dios ã túi chājat*

<sup>3</sup> Jwiít Cristoíhwã caán bícdih jwĩ jumuchah, Dios, jwĩ Maáh Jesucristo íip, jwíih caolihdih búdí ã túi chājna caá. Páant ã túi chājachah jéihnit, caandíh búdí jwĩ wēi naóhna caá. <sup>4</sup> Jwiít áihwādih nin pah Dios át chājap wut jĩ. Nin baácdih ã chājat pínah játih, Jesucristo bícdih jwĩ jumát pínah, yéejat wihcannit ã enechah jwĩ jumát pínahbut niijná, jwiít dih átát ñíojip taga. Pánihna, jwiít Jesús dih jepahnitdih, “Ma yéejat jíib jumna caá”, jwiít dih ã niijcán níit. <sup>5</sup> ã náahat pahjeh jwiít dih oinit, jon játih nin pah Dios át niijíp wut jĩ: “Wã wūúh Cristo ã chājatjĩh queét wã weh ï jumbipna caá”, át niijíp wut jĩ. <sup>6</sup> Pánih oinit, jwiít ã wūúh ã oiniíhwã jwĩ jumuchah, Dios jwiít dih búdí pohba át túi chāj wūhup taga. Páant ã chājatdih jenah joinít, caandíh páantjeh búdí jwĩ wēi naáwát caá náahap. <sup>7-8</sup> Cristo jwĩ yéejat jíib buúdáát panihnidih jíib chājna, áih meépdih yohnit, át wun wūhup wut jĩ.\* Pánih wun wūhna, jwiít

\* 1:1 Hch 18.19-21; 19.1      \* 1:7-8 Mr 10.45; 14.24; He 9.12-14

iiguípna jwĩ bejat déedih túi ɯbnit, Satanás ã chéwat tōp panihnidih át watap wut jĩ. Pánihna, Cristo jwĩ yéejat jíib ã wūhatdih jéihnit, Diosboó jwĩ yéejatdih át yoh wūhup wut jĩ.\* Jwiít dih búdí oi jígah ennit, ã jéih beedáátjĩh ã wūúhdih páant át túi chājat túutap wut jĩ. <sup>9-10</sup> Jon játih ã jenah joyátjidih cáacwādh ã jéihya jwuhcan yuhna, buu jwuhna Dios jwiít áihwāboodih át beh joyánap taga. Nin pah caá ã jenah joyátji: Cristo nihat ã chājatjĩh, nihat japboó jumnit, nin baácboó jumnit, nump bóo tólihboó jumnitdihbut Dios ã ñíoni yeó jáapdih Cristodih maáh ã waadábipna caá. Páant maáh ã jumuchah, nihat áih míc ã jumvipna caá. Dios páant ã chājat pínahdih át wutap wut jĩ.

<sup>11-12</sup> Dios ã náahat pahjeh nihatdih chājnit, jwiít judíowā Cristodih jwíih jepah waóhnitboó jwĩ túi chājat pínah niijná, bitabut Diosdih ĩ wēi naawát pínah niijná, jon játih jwiít dih át níwip wut jĩ. <sup>13</sup> Yéejat jíib iiguípna ñi bejat déedih Jesús ã wun wūhatji doonádih joinít, yeebbút ñitát jepahap taga. Pánih jepahnit, Jesúihwā ñi jumuchah, Diosboó ã naóhniji Túini Espíritudih yeebdih át wahap taga. Pánih wahnit, áihwā ñi jummatdih ã júutna caá.\* <sup>14</sup> Nin baácboó jwĩ jum jwuhuchah, Túini Espiritu jwiít dih Dios ã jwíih wūhni caá. Pánihna, ã pebhboó jwĩ juibínachah, jwiít nihatdih túut nuúm péanit, ã bíboh páinidih ã wūh beedábipna caá, ã wūt chah yáaat pínah niijná.\*

*Pablo Jesúihwādh ã uúbát*

---

\* 1:7-8 Col 1.14      \* 1:13 Lc 24.49; Jn 14.26; 16.13-15; Hch 1.4; 2.33      \* 1:14 2Co 1.22

<sup>15</sup> Páant ã chãjatdih jéihnit, Jesúsdiñ ñi túi jenah joyát doonádih joinít, niñat bita Jesúsdiñwãdih ñi oyat doonádiñhbut joinít, <sup>16</sup> Diosdih ñúbh cádahcan, “Queétdih ma teo wáacat túina caá”, wãpí niijná caá. <sup>17</sup> Nin pahbut jwí Maáh Jesucristoíñ Diosdih wãpí niij ñúbhna caá: “Paá, meém chah wëpni jumna, queétdih ded pah ma jummatdih ma jéihyanaá, meemdíh chah ñ túi jéihyat pínah niijná”, wãpí niijná caá. <sup>18</sup> Nin pahbut wãpí niij ñúbhna caá: “Queétdih túut ñúum jwíhna, ma pebhboó ñ jñibínachah, ma túut ñúum péaat pínahdih ma túi beh joyánaá. Jwiít míihwã caanná jwí jñibínachah, chah búdí ma túi chãjat pínahdihbut, ma jéihyanaá”, wãpí niijná caá. <sup>19-21</sup> Nin pahbut wãpí niij ñúbhna caá: “Ded pah búdí ma wëpat ñ jummatdih queétdih ma jéihyanaá. Caán wëpatjñh Jesucristodih boonit, ma jéihyepmant bóo ñwámant chúudat túutnit, maáh mat waadánap taga.\* Pánihna, caanjñh chúudna, niñat maátadih maáh ñ jumna caá. Búu láa, túttimah bóo láabut páantjeh chah maáh ñ jumbipna caá. Jwiít caandíh túi jenah joinítidih caán wëpatjñh ma teo wáacatdih queétdih ma túi beh joyánaá”, wãpí niijná caá. <sup>22-23</sup> Páant chah wëpni ñ jumuchah, Diosboó niñatdih Jesúsdiñ át wutat túutap taga.\* Pánih chãjnit, Jesúsdiñ wao dáñ panihni, áihwãdih áih bácañ panihñibut át chãjap taga.\* Pánihna, jwiít áihwãjeéh jumni niñat pebhboó ñ jumuchah, áih bácañ panihni jumna, ñ wëpatdih jwiítbut jwí bíbohna caá.

## 2

### *Jíib náahcanjeh, Dios jwiítidih ñ túi ñbat*

---

\* 1:19-21 Sal 110.1    \* 1:22-23 Sal 8.6    \* 1:22-23 Col 1.18

<sup>1</sup> Yeebboó Jesúsdiñ ñi jepahat pínah játih, yeejép ñi chāj jwuhuchah, Diosboó yeebdíh wənnit panihnit pah át enep taga. <sup>2</sup> Játih nin pah ñit jum jwuhup taga: Diosdih yap yohnit ĩ túi chājcat pahjeh, bíic yoobó muntih yeebbút yeejép ñit chāj jwuhup taga. Pánih chājna, nemépwā ĩ maáhboó ā wutatdih ñit jepah jwuhup taga. Caán nemépwā ĩ maáh Dios ā wutatdih yap yohni buu láa nin baácboó jumna, cáacwādiñbut Dios ā wutatdih ā yap yohat túutna caá.\* <sup>3</sup> Játih jwiít niñatbut caan páh jwí chāj jwuhup jī. Dedé jwí weñat pínahdih, jwí yéej jenah joyátdihjehbut jwí chāj jwuhup jī. Páant jwí chājachah ennit, Diosboó jwiít dih íijnit, niñat bita yap yohnit bíicdih, átiñ peéh chājap ta yuh caá.\* <sup>4</sup> Obohjeéhtih, páant jwí jumuchah yuhna, Diosboó jwiít dih búdí át oyop taga. <sup>5</sup> Pánih oi jígah ennit, boonit panihnit pah jwiít dih át chājap taga. Yéej chājnit, wənnit panihnit jum jwuhna, Jesúsdiñ jwí jepahachah, caán bíicdih Diosboó jwiít dih át boanap taga. Yeejépwā jwí jumuchah yuhna, Dios búdí oi jígah enni jumna, jwí yéejat jíib iiguípna jwí bejat déedih jwiít dih át túi ubup taga.\* <sup>6</sup> Cristodih boana, caán bíicdih jwiít dihbut át boanap wut jī. Cristodih ā booaat túttimah, caandíh ā pebhboó chúdat túutnit, jwiít áihwā caán bíicdih jumna, ájeéh maáta jwí jummat pínah niijná, jwiít dihbut ā pebhboó Dios át chúdat túutup wut jī. <sup>7</sup> Pánih chājna, jwiít Cristoíhwādiñ ā oi teo wáacat, débóo búdí ā jummatdih niñatdih ā júutbipna caá. <sup>8</sup> Cristodih jwí túi jenah joyóchah, Dios búdí oi teo wáacni jumna, jwiít dih ā túi ubna caá. Niñdih ñi túi náhninaá: Ded pah jwí túi chājachah yuhna, jwiít míicjeh jwí jéih túi ubcan caá. Obohjeéhtih, Diosboó jíib náahcanjeh jwiít dih át túi

\* 2:2 Ef 6.11-12; Col 1.13    \* 2:3 Col 3.6    \* 2:5 Col 2.13

ubur taga. <sup>9</sup> Dedé jwī túi chājat jíib nihcan, jwiít dih át túi ubur taga. Pánihna, “Wā túi chājat jíib weemdíh át túi ubur taga”, ded ā jéih niijcán caá. <sup>10</sup> Obohjeéhtih, jwī túi chājatjí jíib túi ubcan yuhna, jwī túi chājat pínah niijná, jwiít dih át túi ubur taga. Ded pah jwī túi chājat pínahdih játih átát jenah joijíp taga. Pánihna, Jesúíhwā jwī jumuchah, ded pah ā jenah joyátji pahjeh, túi chājat caá náahap.

*Jwiít Cristoíhwā jumna, bícdih jwī túi jumat*

<sup>11</sup> Nindihbut ñi náhninaá: Játih yeéb judíowā nihcannit, Dioíhwā ñit jum jwuhcap taga. Páant ñi jumuchah, jwiít judíowā quehli nah yapat chóodih bóodnit, Dioíhwā jumna, yeéb bóodcannitdih jwī í en jwuhur jí. Obohjeéhtih, cáacwājeh jwiít dih í bóodochah, Dioíhwā jwī jumatdih júutat pínah ā jumuchah yuhna, dawá wā déewā Diosdih í joyáh bojna caá. <sup>12</sup> Nindihbut ñi náhninaá: Játih Dios ā wahni Cristodih ñit jéih jwuhcap tají. Jwiít judíowā Dios ā ñíonitdih mácah jumna, Dios jwiít dih ā naáwátjidihbut ñit jéihcap tají. “Weemjéh tigaá ñi Maáh. Yeébboó wíih cáacwā ñi jumna caá. Pánihna, weém yeebdíh wā túi chāj wūhbiipna caá”, Dios jwiít judíowādihjeh át níj naáwáp tají. Yeéb judíowā nihcannitboodíh át níj naóhcap tají. Pánih jumna, ded pah ñi yéej chājat peéh, yeebdíh túi ubni pínahboodíhbut ñit jéih jwuhcap tají. Diosdihbut yúup jumnit panihnit ñit jum jwuhur tají. <sup>13</sup> Obohjeéhtih, buu jwuhna, Cristodih jepahna, ā yoh wūhni meépjíh yeéb yúup jumnit panihnitjidih, pehbbit jumnit panihnit Dios át chājap tají.

<sup>14</sup> Jesucristojeh jwiít chéne poómp jumnitjidih bíic poómp pah át chājap taga. Jwiít judíowā, yeéb judíowā nihcannitbut játih tubit míic eníhcannit jwī jumuchah yuhna, Jesús wan wūhna, jwī míic íjatjí jāhat panihnidih,

ãt yoh wãhup tajĩ. Pãant ã yohochah, jwiít áih bácah panihni jumna, bícdih jwĩ túi jumna caá, buca.\* 15-16 Játih jwiít judíowã Diosjeéh túi jumat túut niijná, Moisés ã wutatjidih jwĩ túi jepah beedáhip yuh jĩ. Obohjeéhtih, caandih jwĩ jepah beedácatji jíib búdí peéh chãjat jwiít dih ã jumup jĩ. Pánihna, buu Cristo jwiít dih ã wun wãhatdih túi jenah joiná, Diosjeéh jwĩ túi jumna caá.\* Pánih wun wãhñit, caán peéh chãjatdih ãt ubup wut jĩ. Jwiít chéne poómp jumnitjidih bíc poómpjeh, áih bácah panihni chãjna, bícdih Diosjeéh jwĩ túi jumat pínah niijná, ãt wun wãhup tajĩ.\*

17 Cristo nin baácboó dei jũóhñit, ded pah Diosjeéh jwĩ túi jumat pínah doonádih ãt ub jũúwup tajĩ. Pánih dei jũóhñiji jwúub púuh laab béjna, yeéb judíowã nihcannit Diosdih yúup jumnit panihnitdih, jwiít judíowã caandih pehbbit jumnit panihnitdihbut, caán doonádih ãt naáwát túutup wut jĩ.\* 18 ã wun wãhatjĩh jwiít chéne poómp jumnitjidih jwĩ íp Dios ded pah ã jummatdih ãt jéihyanap tajĩ. Pãant ã jéihyanachah, Túini Espíritu jwiít nihatdih bíc yoobó ã teo wáacatjĩh úumcanjeh Diosdih jwĩ túi jéih úubhna caá. 19 Pánihna, yeéb judíowã nihcannit, játih Diosdih jéih jwuhcan, jwĩ déewã nihcan yuhna, buu yeebbút Jesús dih jepahñit, Dios ã weh ñi jumuchah, jwiít nihát bíc weh pah jwĩ jumna caá. 20 Jwiít nihát bícdih Dios ã chãjni muu panihni jwĩ jumna caá. Jesús áih túini doonádih naáwát túutñit, Dios naáwát dih naóh yapanit bícdih, Dios ã chãjni muú wêp teo lajat panihnidih ãt jwiíh jwejep taga. Jesucristoboó choójboó wêp teo lajni jenah enat jee dáh panihni ã jumna caá.\* 21 Jwiít nihát

\* 2:14 Jn 14.27 \* 2:15-16 Col 2.14 \* 2:15-16 Col 1.20 \* 2:17 Is 57.19

\* 2:20 Is 28.16; Mt 21.42

Jesúsdih jepahnitdih Dios túi jenah ennit, ã duuj páp aabánit, caandíh weñat pínah muu pánihnidih ã chájna caá. <sup>22</sup> Yeebdíhbut túi jenah ennit, bíic yoobó jwíjeéh ã duuj páp aabáát pah ã chájna caá. Pánih chájna, jwiít nihat bíicdih Túini Espíritu ã jummat muu pánihni jwí jumna caá.\*

### 3

*Judíowā nihcannitdih Pablo* túini doonádih naóhni ã jummat

<sup>1</sup> Páant Dios yeebdíh ã túi teo wáacachah jéihnit, weém, Pablo, yeéb judíowā nihcannitdih Diosdih búdí wā uuóbhna caá. Yeebdíh Jesúh túini doonádih wā bohéat jíib nemat muúboó ĩ nemni wā jumna caá. <sup>2</sup> Dios weemdíh oi teo wáacnit, weemdíh áih túini doonádih ã naáwát túutur be. Caandíh ñitát joi tágaá.\* <sup>3-6</sup> Jon játih ã jenah joyátji pah Dios yeéb judíowā nihcannitdih ã oi teo wáacat pínahdih cáacwā ĩ jéih jwuhcah yuhna, buu jwuhna weémboodíh Dios ã túi jéihyanap jí.\* Caandíh yeebdíh wáát naóh daacáp jí. Páant wā daacátjidih ennit, “Pablodih Dios át túi jéihyanap taga”, ñi níj jéihbipna caá. Yeéb judíowā nihcannit, jwiít judíowābut bíic yoobó Jesucristodih jwí jepahachah, jwiít nihat bíicdih Dios áihwā pínah ã chájna caá. Páant ã chájat pínahdih nihat jwí nuowā ĩ jéihcah yuhna, buu jwuhna Túini Espírituboó Jesús áih túini doonádih naáwát túutnitdih, Dios naáwát dih naóh yapanitdihbut át jéihyanap taga. Yeéb judíowā nihcannit, jwiít judíowā bíicdih, jwí yéejat jíib iiguípna jwí bejat déedih, Jesucristodih jwí jepahat jíib, Dios jwiít dih át túi ubur taga. Pánihna, jwiít nihat bíicdih áih báciah panihni jwí

\* 2:22 1Co 3.16-17; 1P 2.4-5 \* 3:2 Col 1.25 \* 3:3-6 Gá 1.12

jumna caá. Páant jwĩ jumuchah, áih cáacwãdih ã naáwátji pahjeh jwiít nihat biíc dih ã túi chãjbipna caá.\* 7 Dios weemdih oi teo wáacnit, nin túini doonádih yeéb nihat judíowã nihcannitdih ã naáwát túutap jĩ. Pánih naáwát túutnit, Dios ã wēpatjĩh weemdih ã jéihyanap jĩ, wã túi naáwát pínah niijná.

8 Nihat Jesúhwãdih jenah joinít, oboh jumni wã jumuchah yuhna, Diosboó weemdih búdí ã oi teo wáacap jĩ, judíowã nihcannitdih Jesucristoĩh túi doonádih wã naáwát pínah niijná. “Jesucristodih ñi jepahachah, Diosboó yeebdih búdí ã túi chãjbipna caá”, wãpĩ niíf naóh bohéna caá.\* 9 Pánih túini doonádih bohéna, Dios nihatdih chãjni, ded pah ã jenah joyátji ã jéihya jwuhca naáhdih buu nihat cáacwãdih wã túi jéihyana caá. 10 ¿Pánih chãjna, ded panihat pínahji ta tigaá? Dios nihat cáacwã, bita poómpna jumna yuhna, Jesucristodih ĩ jepahachah, biíc dih áihwã pínah ã chãjachah ennit, nihat áih ángelwã, nihat nemépwãbut Dios chah ã túi jéih beedáatdih ĩ jéihyat pínah niijná, páant át chãjap wut jĩ. 11 Dios biíhmah páant ã jenah joyátji biíc yoobó, jwĩ Maáh Jesucristo ã wun wūhatjijĩh át chãj beedánap wut jĩ. 12 Pánihna, Jesucristodih jepahnit, áihwã jumna, úumcanjeh, “Weemdih ã túi joiná nacaá”, niíf jéihnit, Diosdih jwĩ túi jéih uúbhna caá. 13 Pánih jumnit, yeéb judíowã nihcannitdih túini doonádih wã naáwát jíib weemdih yeejéy yapat doonádih joinít, ñi jígahca bojoó. Yeebdih jígahaat pínah nihcan, Diosjeéh ñi túi jumat pínah caá. Pánihna, caandih jenah joinít, ñi túi weñeé.

### *Jesucristo ded pah ã oyat*

\* 3:3-6 Col 1.26-27      \* 3:8 1Co 15.9



<sup>14</sup> Yeéb judíowā nihcannit, jwiít judíowā bícdih Jesucristoíhwā jumna, jwí ípdih bódicha caj yoh ñajnit, yeebdíh búdeí wā úúbhna caá. <sup>15</sup> Dios ā pebh jumnitdih, nihat nin baácdih moondíhbut mácah poómp jwí jumachah yuhna, áihwādih bíc weh pah át chājap wut jī. Pánih chājna, jwiít dih áih wūt át búudhdap wut jī. <sup>16</sup> Pánihna, nin pah yeebdíh jwí íp Diosdih wāpí níj úúbhna caá: “Paá, meém chah wēpni jumna, Túini Espiritujīh queétdih búdeí ma teo wáacá, <sup>17</sup> queét Cristodih í túi jenah joyóchah, áih muu pánihni, íih caolihboó ā túi jummat pínah niijná. Pánih jumna, túi oinit, ded pah chājna, í chāja naáh. Maa náatna baác numah bejna, buujcán ā túi tewat dée pah, queétdih túi oinit í jummu naáh, túinijeh í chājat pínah niijná”, wāpí niijná caá. <sup>18</sup> Nin pahbut wāpí níj úúbhna caá. “Paá, Cristo ā oyat ded pah búdeí ā jummatdih queétdih, nihat bita míhwādihbut, ma túi beh joyánaa. <sup>19</sup> Jwí jéih beh joí beedacah yuhna, ma teo wáacá, búdeí ā oyatdih í jéihyat pínah niijná. Páant í jéihyechah, ded pah ma túi jéih beedáatdih, ma oyatdihbut queétdih búdeí ma jéihyanaa, ma náahat pah í túi chājat pínah niijná”, jwí ípdih wāpí niijná caá.

<sup>20-21</sup> Ded pah Diosdih jwí úúbát dih, jwí jenah joyát dihbut caán chah búdeí ā jéih chājna caá. Páant caán chah wēpni jumna, jwíih caolih díftboó Túini Espiritu ā wēpatjīh jwiít dih búdeí ā jéih teo wáacna caá. Páant ā chājachah, nihat cáacwā, buu lāa moón, túttimah bóo lāa moonbút caandíh búdeí í weñe naáh. Ded pah nihat áihwādih búdeí ā teo wáacatdih ennit, ded pah Jesucristo ā túi chāj wūhatjidihbut ennit, Diosdih páantjeh weñat caá náahap. Páant tíí ā jummu nah.

## 4

*Jwiít Cristoíhwā biícđih ded pah jwĩ jummat*

<sup>1</sup> Yeéb judíowā nihcannitdih wā bohéat jíib nemat muúboó jumna, nin pah yeebdíh wā wutna caá. Yeéb Dios ã ñíonit jumna, túinijeh jummat caá náahap. <sup>2</sup> “Weém oboh jumni caá”, níj jenah joinít, bitadih jũihcannit ñi jummuú. Bita yeebdíh yeejép ĩ chājachah yuhna, queéđđih íjcanjeh oinit, ded pah ĩ chājatjidih ñi jwúub náhnica bojóó.\* <sup>3</sup> Pánih jumnit, yeéb túi biícđih Túini Espíritu ã chājatjidih ñi yéejacan níit. Túi biícđih jwĩ jummat pínahđih jwiít Dioíhwāđih búdí bidat caá náahap. <sup>4</sup> Jwiít nihat biícđih Jesucristoíh bácah panihnijeh jwĩ jumna caá. Jwiít nihatđih Dios ã wahni Túini Espíritu biícđeh tigaá. Jwiít nihat Dios ã ñíonit ã pebhboó jwĩ bejat pínahđih biíc yoobó jwĩ páina caá. <sup>5</sup> Caán biíc Jesússeh tigaá jwĩ Maáh. Caán Jesúsđihjeh tigaá jwiít nihat jwĩ jepahap be. Jesúsđih jwĩ jepahat júutna, biíc yoobó daabánit jwĩ jumap be. <sup>6</sup> Caán biíc Diosseh tigaá jwiít nihatđih jáap caolih dée át chājap taga. Pánih chāj wūhna, jwiít nihat jwĩ íip jumna, jwĩ Maáh caá. Ā maáh jummat nihat chah ã wēpna caá. Pánih jumna, jwiít nihatđih ã teo wáacna caá, ã weñat pínahđih jwĩ túi chājat pínah niijná. Jwiít nihat cātíh ã jumna caá. Páant ã jumuchah, biíc weh dée pah túi jummat caá jwiítđih náahap.

<sup>7</sup> Obohjeéhtih, biíc weh dée jwĩ jumuchah yuhna, ã náahat pah mácah jéihyatnadih jwiít nihatđih Cristo át wūhup taga. <sup>8</sup> Pánihat pínahđih jenah joinít Davidjiboó nin pah át níj daacáp tajĩ:

“Caandíh eníhcannitdih yap yohnit, Dios pebhboó ã jwúub púuh laáb juibíát túttimah, áihwāđih túini-

---

\* 4:2 Col 3.12-13

dih át wūhup taga”, át niij daacáp tajī. (Sal 68.18)

<sup>9</sup> Pánihna, “jwúub púuh laáb juibíát”, ā niijíchah, “Nin baácboó jumnit, caandíh eníhcannitdih ā yap yohat túttimah, wūnnitji ī jumupboobút át dei bej jwuhup wut jī”, jwī niij jéihna caá. <sup>10</sup> Pánih caanná dei bej jwuhniiji, nihatdih maáh jumat tútt niijná, Dios pehbhoó át jwúub púuh laab béjep wut jī. <sup>11</sup> Pánih púuh laab béjnit, áihwādih Túini Espíritudih wah deyana, mácah jéihyatnadih át wūhup taga. Biquínadih Jesúh túini doonádih naóh peetát pínah jéihyatdih át wūhup taga. Bitaboodíh Túini Espiritu ā naáwáchah joinít, naóh yapaat pínah jéihyatdih át wūhup taga. Bitaboodíh Jesúh túini doonádih jáap joinít ī túi jepahat pínah niijná, wēp naáwát pínah jéihyatdih át wūhup taga. Bitaboodíh Dioíhwādih duó wáinit, ā naáwát-dih ī túi bohéat pínah jéihyatdih át wūhup taga. <sup>12</sup> Pánihatdih Cristo jwiít áihwādih át túi wūhup taga, Dios ā weñat pínahdih chājnit, jwī túi míc teo wáacat pínah niijná. Pánih míc teo wáacna, ded pah Dios ā chājat túttuchah, jwī túi jéih chājna caá. Pánih jumna, jwiít nihat bícdih Diosdih jwī chah túi jenah joibípna caá. Jwiít Cristoíh bácah panihni jumna, wébít ā behat dée pah, bícdih jwī túi behbipna caá. <sup>13</sup> Pánihna, jwiít Dioíhwā túi behna, Jesús Dios wūúhdih chah jenah joinít, jwíjeéh ā jummatdihbut chah jéihnit, bícdih jwī túi jumbipna caá. Pánihat túttimah, túi behnit dée pah jumna, Jesucristo ā jummat pah muntih jwiítbut jwī jumbipna caá. <sup>14</sup> Pánihna, Jesucristo ā wūhni jéihyatnajīh túi míc teo wáacna, wébít dée jwī jumcan niít. Wébítboó dedé naáwát-dih joinít, ípí túi joiná caá. Pánih joiná, bita queédih yeenit yeejép ī chājat túttuchah, ī jepahna caá. Bita Dios naáwát-dih ded pah mácah ī yee naáwáchah, ípí túi joiná caá.

Cáac wihcanni jāáj chóo dée pah ī jumna caá. Íim tac yoób pahachah, johlit nolihatbut caán chóodih ā wénoh johochah, yoobópdih ā bejcan caá. <sup>15</sup> Jwiít dih pánihat dée jumcat caá náahap. Dios yoobópdih naóhni ā jéih yeecan caá. Páant ā jumuchah, ā naáwát dih joí cádahcan, ded yee naóhni dih joyáh bojnit, bitadih oinit, yoobópdih naáwát caá náahap. Pánih jumna, Dios ded pah jwiít dih ā chājat tútat dih túi beh joinít, beh bejnit dée pah, yeó jáap jummat pah jwī Maáh Jesucristodih chah jwī túi jenah joibírna caá. Caán jwī Maáh jumna, wao dáh panihni caá. <sup>16</sup> Jwiít boó áih bácah panihni caá. Áih muj nah, áih téihya, áih jítcha, áih táah panihni jwī jumna caá. Cáaquíh bácah túi dūuj ñúhna, ñeh tōpna túi wēpna, ā túi jumna caá. Pánihat dée, jwiít boó túi biíc dih míc oinit jumna, jwī túi jumna caá. Pánih míc oina, mácah jwī jéihyat najih míc teo wáacna, beh bejnit dée pah, Dios ā weñat pínahdih biíc dih jwī túi jéih chājna caá.\*

*Jwiít Cristoíhwā* jumna, túni boodih jwī túat nuumát

<sup>17</sup> Jwī Maáh ā naáwát tútat ji pah yeebdíh wā wēp wutna caá. Ñi déewā Diosdih jéihcannit ī chājat dée pah, yeebboó ñi chāj cádahaá. Queét boó túi jenah joicánnit, tubit yeejép ī chājna caá. <sup>18</sup> Ded pah Dios ā jummat dih beh joicán, dúpúát panhipboó jumnit, Diosdih yuúp pah ī jumna caá. <sup>19</sup> Dios ded pah queét dih ā wutuchah yuhna, queét jéih joicánnit panihnit ī jumna caá. Pánih joicán, tíic jenah joicánjeh, ī yéj chājat dih cádahíhcan, chah ī bidna caá.\* <sup>20-22</sup> Obohjeéhtih, Cristoíh túini doonádih bita yeebdíh ī túi bohénachah joiná, bita yeejép chājnit pah jumcan, Jesús ā jummat pah yeebdíh it jummat túatup tajī. Máa yéguehdih yohat dée pah, játih ñi yeejép

\* 4:16 Col 2.19 \* 4:19 Ro 1.21-25

chājatjidih cádahat pínah niijná, ït bohénap tajī. “Jwiít yeejép chājnit, búdí jwī wēibipna caá”, játih ñit niíj jenah joyóp ta yuh jī. Obohjeéhtih, wēican, chah yeejép chāj bejna ñit chājap tajī.\* <sup>23</sup> Pánih yeejép ñi jenah joyát-dih cádahnit, túiniboodíh túut nuumná, Dios ã weñat pínahdihjen jenah joyát caá náahap. <sup>24</sup> Páant niíj jenah joinít, túiniboodíh ñi chājibipna caá. Dios ã jummat pah jwī jummat pínah niijná, jwiít-dih jáap dée ãt chājap taga. Páant ã chājachah jéihnit, jwiít-dih túi chājat caá náahap.\*

<sup>25</sup> Ñi yeeatdih ñi cádahaá. Jwiít biíc bácah panihnit jumna, múic yeena, jwiít múicjeh jwī múic yéejana caá. Pánihna, yeecanjeh, yoobóp-dih múic túi naáwát caá náahap.\*

<sup>26</sup> Bitadih íjna yuhna, yeejép ñi chājca bojoó. Caán yeó jáapjeh ñi íj cádahaá.\* <sup>27</sup> Ñi íj-atdih quíib buudcán, nemép ã náahatboodíh ñita chāj tagaá.

<sup>28</sup> Ded nuumní ã nuumát-dih ã cádaha naáh. Nuumcán-jeh, ded moh yéejnidih teo wáacat túut niijná, túinidih ã tewe naáh.

<sup>29</sup> Í náah jumni naáwát-dih ñi múic naóhca bojoó. Túi múic teo wáacat túut niijná, túiniboodíhjen ñi múic naáwá. <sup>30</sup> Jwiít Dios pebhboó jwī bejat pínahdih jwī jéihyat pínah niijná, Dios Túini Espíritu jwiít-dih ãt wahap taga. Pánihna, yeejép chājna, caandíh ñi jígahaca bojoó.

<sup>31</sup> Bitá yeebdíh í túi chājcatdih jwíub náhnican, ñi quíib buudú. Páant ñi quíib buudcáh, maiwá man pah ñi íjat yeebdíh ã yéejabipna caá. Pánih íj yapnit, ñi múic jūih ñaacát-dih ñi cádahaá. Bitadih yeejép dooná ñi naóhca bojoó. Dedé yeejép ñipí múic chājatdih ñi cádahaá. <sup>32</sup> Pánih cádahna, yeéb múicjeh oina, jígah ennit, ñi túi

\* 4:20-22 Col 3.9 \* 4:24 Gn 1.26; Col 3.10 \* 4:25 Zac 8.16; Ro 12.5

\* 4:26 Sal 4.4; Stg 1.19-20

míc teo wáacá. Yeebjéh ñi míc yéej chājatjidih ñi míc ámoahoó. Diosboó jwĩ yéejatdih ã yohat pínah niijná, Cristo jwiítidih át wun wūhup wut jĩ. Páant ã yohat pah, yeebbút bitadidih ñi eníhcatdih yohat caá náahap.\*

## 5

*Dios weh j̄umna*, ded pah jwĩ j̄umat

<sup>1</sup> Jwĩ weh jwiítidih ennit, biíc yoobó ĩ chājat dée pah, Dios weh ã oinit j̄umna, caandíh jenah joinít, biíc yoobó ñi j̄umú. <sup>2</sup> Pánih j̄umna, Jesucristo jwiítidih ã oyat pah, bitadidihbut ñi túi oyoó. Pánih búdí oinit, jwĩ yéejat jíib, caán jwiítidih át wun wūhup wut jĩ. Judíowā Dios ã weñat pínah niijná, caandíh oveja wūúhdih ípí mao cáo wūhup jĩ. Páant ĩ mao cáo wūhat dée pah, Jesús jwiítidih át wun wūhup wut jĩ.\*

<sup>3</sup> Jesúíhwā j̄umna, dedé í náah j̄umnidih ñi chājca bojoó. Pánih chājatdihbut ñi jenah joicá bojoó. Bitáih bíí déedihbut ñi en ñinahca bojoó. Páant ñi chājcah, yeebdíh dooná ã wihcan níít. <sup>4</sup> Dedé í náah j̄umnidih míc niijcán, jenah joicánnit pahbut míc wéhecan, ñi míc yeejép deoh naóhca bojoó. Dios túini ã j̄umuchah, áihwādih túinijeh míc wéheat caá náahap. Pánih míc wéhena, “Jwiítidih ma túi chājna caá”, Diosdih niiját caá yeebdíh náahap. <sup>5</sup> Nindih ñi túi náhninaá: Ded í náah chājni, ded í náah chājat jenah joiníbut Dios pehbboó ã waadcán níít. Ded dawá bíí déedih en ñinahnitbut ã waadcán níít. Pánih en ñinahni bíí déedihjeh wēinit, Diosboodíh ã jéih wēican caá. Pánih chājni Jesucristo ã maáh nihcah, Dios maáh ã j̄umupboó ã j̄uibcán níít. Pánihatdih yeéb ñi túi jenah joyoó.

\* 4:32 Col 3.13 \* 5:2 Ex 29.18; Sal 40.6

<sup>6</sup> “Páant ñi chājachah, ã túina caá”, ded ã niíj yee naáwáchah yuhna, yeéboó ñi joyáh bojoó. Pánih yeejép chājnit Dios ã wutatdih ĩ yap yohatji jíib, búdí íijnit, queétdih ã peéh chājbična caá. <sup>7</sup> Pánih yeejép chājnitdih ñi pej jumca bojoó. <sup>8</sup> Diosdih ñi jepahat pínah játih, túi chājcan, dápúát panhipboó ñit jum jwuhup taga. Obohjeéhtih buu, Jesucristodih jepahna, baabát panhipboó ñi jibna caá, buca. Pánih jumnit, túinijeh ñi chājaá. <sup>9</sup> Baabát panhipboó jumna, túinijeh ñi jumbična caá. Yeecanjeh, yoobópdič ñi naóhbiczna caá. <sup>10</sup> Dios ded pah ã weñat pínahdih ñi bidíí. <sup>11</sup> Diosdih náahcannit dápúát panhipboó jumna, yeejép ĩ chājat pah yeéboó ñi chājca bojoó. Páant ĩ túi chājcatdih ennit, Dios naáwátđih naóhna, “Páant ñi chājachah, ã túican caá”, queétdih ñi niijí. <sup>12</sup> Cáacwã ĩ encah, queét yeejép wã tubit yeejép ĩ chājatdih bitadič míic wéhena, jwíta tíic tagaá. <sup>13</sup> Queét yeejép chājnitdih Dios naáwátđih naóhna, jiiátjĩh jii bídat pah chājna, ĩ chājat yeejép ã jummatdih queétdih jwĩ jéihyana caá. Páant ĩ yéj chājatdih jwĩ jéihyanachah, ĩ túut nuumbična caá. Pánih túut nuumnít, baabát panhipboó ĩ jumbična caá. <sup>14</sup> Pánihat pínah caá nin pah jwĩpí niíj ewep:

“Ūoni panihni, ma jáa bojoó. Wunni panihnibut, ma boo pud jũúwú. Meém yeejép chājni baabát panhipboó ma jummat pínah niijná, ma túi chājat pínahdih Jesucristo meemdíh ã jéihyabiczna caá”, jwĩ niijná caá.

<sup>15</sup> Pánihna, jñi túi chāja chaáh! Jenah joicánnit pah jumcanjeh, túi jenah joinít ñi jumúú. <sup>16</sup> Buu láa cáacwã tubit yeejép ĩ chājachah, yeéboó yeó jáap jummat pah Dios ã weñat pínahdih jenah joinít, túinijeh ñi chājaá.\*

<sup>17</sup> Pánih jenah joicánnit jumcan, Dios ã weñat pínahdih

\* Efesios 4:5

ñi túi beh joyoó. <sup>18</sup> Ñi weñat pínahdih bidna, babh máihca bojoó. Máihnit, ñi jenah joyátdih, ñih báhahdihbut ñi yéejana caá. Yeejépdihbut ñi chájna caá. Máihñat yeebdih yeejépdih wətni dée caá. Obohjeéhtih, Túini Espíritu ã túi teo wáacat pínahdih búdí ñi bidíi. Caán ã wūhni weñat pínahdihjeh ñi bidichah, caánboó yoobópdih weñat ã wūhbipna caá. Caán túiniboodihjeh wətni caá. <sup>19</sup> Míic wéhenit, Diosdih ñi weñeé. Pánih wēina, David ã daacátjidih, bita ĩ daacátjidihbut eonit, Túini Espíritu ded pah ã jéihyanachah, caandihbut ñi eweé. Caolih díftboobát caandih wēinit, ñi eweé. <sup>20</sup> Pánih jumnit, yeéb Cristoíhwā ded pah ã yapachah, bíic yoobó “Ma túi chájna caá, Paá”, Diosdih niijnít ñi jumúá.\*

*Jesúihwā áa jumnit ded pah ĩ jummat*

<sup>21</sup> Cristojeéh túi jummat túut niijná, bita Jesúihwā ĩ jenah joyátdih ĩ naáwáchah, wēi joinít ñi míic túi jepahaá.

<sup>22</sup> Jwī Maáh Jesúsdiñ ñi jepahat dée pah, yeéb yaádhboó ñi weha mánadiñ ñi túi jepahaá.\* <sup>23</sup> Nin pah ã jumna caá: Newé wao dáh panihni ã jumuchah, ájeéh bóli áih bácah panihni mi jumna caá. Pánihna, mi áaboó mi maáh panihni caá. Pánihat pah, Cristo maáh jumna, wao dáh panihni ã jumuchah, jwiít áihwāboó áih bácah panihni jwī jumna caá. Caanjéh jwiít diñ túi ubni ã jumna caá. <sup>24</sup> Pánihna, Cristoíhwā jumna, caandih jwī túi jepahat pah yadboó mijeeh bóodiñ jepahat caá náahap.

<sup>25</sup> Būu yeéb neoná áa jumnit diñ jwūh wā jwūub naóhna caá. Cristo jwiít áihwādiñ búdí oina, jwiít diñ át wun wūhup wət jī. Pánihna, jwiít diñ ã oyat pah, yeebbát ñi weha mána yaádhdiñ ñi túi oyoó.\* <sup>26</sup> Jwiít áihwā jwī jummat pínah niijná, Cristo jwiít diñ wun wūhudiñ át

\* 5:20 Col 3.16-17 \* 5:22 Col 3.18; 1P 3.1 \* 5:25 Col 3.19; 1P 3.7



dei jūwúwup tajī. Pánihna, áih túini doonádih joinít, jwī jepahachah, yéguehdih jwī choc yohat pah, jwī yéejatdih át yoh wūhup taga. Áihwā jwī jumat júutat pínah niijná, jwī daabánap jī. <sup>27</sup> Pánih yéejatdih yoh wūhna, jwiít nihat áihwādih Dios pebhboó Jesús ā ub bejehchah, túini yoobát yéejat wihcannit, quei wíhcannit, wiguihat wihcannit, túi jígohnit jwī jumbipna caá.\* <sup>28</sup> Cristo áihwā áih b́acah déedih āpí túi en daoná caá. Pánihat pah, yeéb neoná níih b́acahdih nípí míc túi en dawát pah, ñi weha mána yaáhdih túi en dawát caá náahap. Queétboó níih b́acah dée jumna, queétdih túi en daonít, níih b́acahdihbut túi en daoná caá ñi chājap. <sup>29-30</sup> Jwiít nihat jwíih b́acahdih yéejaihcan, caandíh jwípí túi chājna caá. Pánihat pah, jwiít Cristoíhwā áih b́acah dée jwī jumuchah, caanbút jwiít dih āpí túi chājna caá. Páant ā túi chājat pah, jwī weha mána yaáhdih túi chājat caá jwiít dihbut náahap. <sup>31</sup> Nin pah Moisés át niíj daacáp tajī: “Páant tigaá ded newé yad pínahdih ubna, ā mánadih pahnit, ājeéh bólijeéhjeh ā jumbipna caá. Pánihna, queét chénewā jumna yuhna, bíic b́acah dée pah ī jumbipna caá”, át niíj daacáp tajī.\*

<sup>32</sup> Páant ā niiját dih beh joyát ā buona caá. Obohjeéhtih, buona yuhna, yoobópdih ā jumna caá. Nin pah niíj naóhna caá át chājap: Jwiít nihat Cristoíhwā áih b́acah panihni jumnit, ājeéh bíic pah jwī jumna caá. <sup>33</sup> Pánihat dée, yeéb neoná ñi weha mána yaádhjeéh bíic pah ñi jumna caá. Pánih jumnit, ñi weha mána yaáhdih túi oyat caá náahap. Yaádhbut ñi weha mánadih túi joyát caá náahap.

\* 5:27 2Co 11.2; Ap 21.2,9 \* 5:31 Gn 2.24

## 6

*Ī mána ĩ wehjĭh ded pah ĩ jummat*

<sup>1</sup> Bũũ yeéb wébít dih jwũh wā jwúũb naóhna caá. Jwĩ Maáh Jesúsdih jepahnit jumna, ñi mána ĩ wutũchah, jíponih niicánjeh, ñi jepahaá. Páant chājatdih yeebdíh Dios ā náah yacna caá.\* <sup>2-3</sup> Jon játih Moisés nin pah át niíj daacáp tajĩ: “Ñi mánadih ñi túi chājaá. Pánih chājna, búdí wēinit, nin baácboó maatápdih ñi túi jumbipna caá”, át niíj daacáp tajĩ.\* Páant niíj wutna, jwĩh láa nin pahbut át niijíp wut jĩ: “Páant ñi chājachah, wā niijátji pah yeebdíh wā túi chājipna caá”, át niijíp wut jĩ.

<sup>4</sup> Bũũ yeéb ĩ mánadih jwũh wā jwúũb naóhna caá. Ñi wehdih tũbit jũihnit, ñi íjaca bojoó. Obohjeéhtih, oinit, ñi túi wái behanaá. Dios ā weñat pínahdih ded pah ĩ chājat pínahdih ñi bohénaá. Dios naáwát dih ĩ joyáh bojochah, ñi túi joyát túutú.\*

*Teo wũhnit, ĩ maátabut ded pah ĩ jummat*

<sup>5</sup> Bũũ yeéb teo wũhnit dih jwũh wā jwúũb naóhna caá. Yeebdíh wutnit ĩ peéh chājat pínahdih úumna, queétdih ñi túi jepahaá. Cristodih ñi jepahat pah, queétdihbut wēinit ñi jepahaá. Yabhcanjeh, queétdih ñi túi teo wũhũú.<sup>6</sup> Yeebdíh wutnit ĩ enechahjeh túi teona yuhna, ĩ encah teocannit ñi jumca bojoó. Obohjeéhtih, Cristodih teo wũhnit jumna, Dios yeebdíh ā náah yacat pah túi wēi chājnit ñi jumũú.<sup>7</sup> Pánihna, ded pah teo wũhna, cáacdih-jeh teo wũhcan, wēinit, jwĩ Maáhboodíh-jeh ñi teo wũhũú.<sup>8</sup> Pánih chājnit, nindih ñi túi náhninaá: Ded pah túini ñi chājachah, Diosbut túinidih yeebdíh ā chāj jwúũbabipna caá. Ñi teo wũhũchah, cáacwā yeebdíh jíib wũhna, ĩ

\* 6:1 Col 3.20 \* 6:2-3 Ex 20.12; Dt 5.16 \* 6:4 Col 3.21

wūhcahbut, biíc yoobó Dios táinidih ã chāj jwúubabipna caá.\*

<sup>9</sup> Buu yeéb queét ĩ maátadih jwuh wā jwúub naóhna caá. Yeebdíh teo wūhntdih túinijeh ñi chājaa. “Wā wutadih ma jepahcah, búdí wā peéh chājbipna caá”, ñi niíj jūihca bojoó. Nindih ñi túi náhninaá: Jwí Maáh Jesucristo, Dios pehbboó jumni queétdihbut ĩ Maáh caá.\* Pánihna, yeéb maáta ded pah ñi chājatdih jéihnit, yeebdíh teo wūhnt ĩ chājatdihbut jéihnit, biíc yoobó ñi chājat jíib ã túi wūhbipna caá.\*

*Jwiít Cristoihwā ded pah nemépwādh jwí jéih yap yohat*

<sup>10</sup> Buu yeebdíh péeni wutadih wā naáwíhna caá. Jwí Maáh Jesús nihatdih jéih beedáni ã jumuchah, jwiít caán biíc dih jumna, caandíh túi jenah joinít, nemépwādh yap yohnit jummat caá náahap. <sup>11</sup> Romadih moón soldadowā ĩ maáh nihat ã wūhni míic maona ĩ jāhat chóodih ĩpí dnoná caá. Pánihat dée pah yeebbút jwí Maáh Dios nihat ã wūhni jāhat pínahdih ñi ubuú, nemép ã yeeatdih túi yap yohat túut niijná. <sup>12</sup> Cáacwādhijeh pohba nihsan caá jwiít dih míic mawat panihni ã jumup. Obohjeéhtih, wépép nemépwādh jwí míic maona caá. Queét nihat jwiít cáacwādh yeejép ĩ wutna caá. Jwiít Jesúihwādh chah eníhcan, Dios ã wutadih ĩ yap yohat túutna caá. <sup>13</sup> Pánihna, ĩtah chóo panihni, nihat Dios ã wūhni jāhat pínahdih ñi ubuú, nemép yeebdíh yeejép ã chājat túutuchah yuhna, ñi túi yap yohat túut niijná. Pánih chājna, míic mao péanachah, náo jweicánjeh, wép ñuhnit panihnit ñi jumtipna caá.

<sup>14</sup> Túi yap yohnit pínah jumíhna, nin panihnit ñi jumuu: Soldado áih juyáát tōpjih āpí juí wái chéona caá,

\* 6:8 Col 3.22-25 \* 6:9 Col 4.1 \* 6:9 Dt 10.17; Col 3.25

áih yégueh chóodih ã túi tewat pínah niijná. Pánihat dée, yeebbút yoobópdih naóhnit ñi jumúú. Soldado áih tacadihbut ïtah chóo ápi dæoná caá, caandíh eníhcannit áih caolihdih ï ñúup chũúacat pínah niijná. Pánihat dée, yeebbút Dios ã wēpatjīh túi yoobópdih chājat caá náahap, nemépboó ñíih caolihdih ã jéih yéejacat pínah niijná.\* <sup>15</sup> Soldado áih jítchadih túi wēpép zapatosdih ápi dæoná caá, ã túi bejat túut niijná. Pánihat dée, yeebbút Diosdih túini doonádih ñi túi joí cádahca bojoó, jwī maáhjeéh túi jumnit, bitadih naáwádih ñi túi bejat túut niijná.\* <sup>16</sup> Soldado áih bácahdih jāhat naadīh ápi ubna caá, caandíh eníhcannit íih ñúupat doóbhnadih cáo dodhnit, ï ñúupuchah ennit, caán naajīh ã túi míic jāhat túut niijná. Pánihat dée, yeebbút Diosdih túi jenah joí cádahca bojoó, nemépboó chah yeejép ã yee wutuchah yuhna, ñi joyáh bojat túut niijná.\* <sup>17</sup> Soldado ïtah waochá páhadih ápi páahna caá, áih wao dáhdih ã túi wapat pínah niijná. Pánihat dée, Dios yeebdíh ã túi ubatjidih ñi túi náhninaá, nemép ñi jenah joyátdih ã yéejacat pínah niijná.\* Soldado íibat naadīh ápi ubna caá, caandíh eníhcannitdih ã túi míic mawat túut niijná. Pánihat dée, Túini Espíritu ã teo wáacatjīh ded yeebdíh yéejafñidih Dios naáwátdih ñi naáwá,\* caandíh ñi túi yap yohat túut niijná.\* <sup>18</sup> Pánih jumnit, ded pah ã yapachah, Túini Espíritu ã teo wáacatjīh Diosdih ñi túi úúbh cádahca bojoó. Pánih úúbhna, ñíih pínahdih úúbhnit, bitaíh pínahdihbut ñi úúbú. Ëonit panihnit jumcanjeh, jáanit panihnit túi jenah joinít ñi jumúú. Nihat Jesúíhwādhbut ñi úúbh cádahca bojoó. <sup>19</sup> Pánih úúbhnit, weemdíhbut búdí ñi úúbú, úumcanjeh

\* 6:14 Is 11.5; 59.17      \* 6:15 Is 52.7      \* 6:16 Sal 7.13      \* 6:17 Is 59.17  
 \* 6:17 He 4.12      \* 6:17 Ro 13.12-14; 1Ts 5.8

Jesúh t́ini doonádih yoobópdih wā t́i naáwát pínah niijná. <sup>20</sup> Caán doonádih wā naáwát jíib nemat m̄úboó ítah t̄p̄j̄h chéoni wā jumna caá. Pánihna, caán t́ini doonádih naóhnit, úmcanjeh wā t́i wēp naáwát pínah niijná, weemdíh ñi úbú. Weemdíh páant naáwát caá náahap.\*

*Pablo ã péé túyat tútat*

<sup>21</sup> Ded pah wā jummatdih ñi jéihyat pínah niijná, yeeb pébhna Tíquicodih wā wahna caá.\* Caánboó Jesúsdih t́i jéihni, jwí oini caá. Jesúh t́ini doonádih wā naóh jibichah, weemdíh búdí ãpí teo wáacna beé. Pánihna, ñi pebhna j̄ibínit, nihatdih yeebdíh ã naóhbipna caá. <sup>22</sup> Páant ã naáwáchah, wā t́i jummatdih jéihnit, ñi jígahat ã yayát pínah niijná, ñi pebhna caandíh wā wahna caá.

<sup>23</sup> Jwí íp Dios, jwí Maáh Jesucristo biícđih yeéb Jesúhwā ñi t́i jumú. Pánih jumna, Jesucristodih t́i jenah jói cádahcan, chah míic oinit ñi jumú. Páant ñi jummat pínahdih Dios ã teo wáaca naáh. <sup>24</sup> Yeéb nihat jwí Maáh Jesucristodih oi cádahcannitdih Dios ã oyatj̄h ã t́i chāja naáh. Yeebdíh búdí wā túyat túttna caá.

Páant bóojeh tigaá.

Pablo

---

\* 6:20 Col 4.2-4      \* 6:21 Hch 20.4; 2Ti 4.12

## Dios ã jáap naáwát tólih New Testament in Cacua

copyright © 2008 Wycliffe Bible Translators, Inc.

Language: Cacua

Translation by: Wycliffe Bible Translators, Inc.

### Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cacua

**© 2008, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

---

